

寶
綸
堂
文
鈔

寶綸堂文鈔卷七

天台齊召南次風謨

無錫秦瀛凌滄校

河清海晏頌

謹序

臣聞美盛德之形容曰頌自有書契可紀以來累洽重熙昇平之治總未有盛於我

朝者也欽惟我

皇上

聰明睿智

文武聖神

序三辰而調五行

溥九垓而燭八表太和翔洽下際上蟠瑞應之符神人
協贊磴磴卽卽雜遝總至河伯海王歆我秩祀經天絡
地祗承率職以湊嘉祥黃流澄光若鏡者數百里

上特遣官致祭事付史官近復自刷引河實維神力環
海晏如微波不揚暘谷島嶼建師作牧賈舶颺蹕億萬
里不異平地樓船橫海之軍青雀黃龍五牙海鯨之艦
設而不用外則候月歸琛占風納節舉歷代鞮譯所弗
及者莫不持明珠寶貝向

闕廷厥角享王大者特來小者附至

聲教覃敷蓋若斯之隆也粵稽唐虞平成永賴九敘維

歌然其咨俾又幸而奏績安瀾雖九川滌源大河石水
斗泥不聞其流克滌成周懷柔河稱翁矣而淮海徐奄
尚多梗化南又不踰衡山白雉貢自越裳卽云絕域幅
員亦少狹焉猶且紀歌頌垂將來矧清晏如我
朝其可無頌聲以形容

聖天子穆穆之盛德

臣

誠不自揆敬拜手稽首倣古而

作頌曰

維

清緝熙

皇篤其祐蕩蕩巍巍不冒下土璧合珠聯營室攸聚載

歌南薰以躋東戶皞皞太平登三咸五嘉休叶應神靈
錫與彼河洋洋厥色維黃自星宿海東趨混茫挾泥與
沙遷徙靡常旣道於夏旋圮於商隄之宮之白馬宣房
今也湜湜如彼淮江百谷之王是曰海若島嶼出沒幬
以寥廓如星斯列如繡斯錯風颿駕濤或鯨或鱷或橫
不來或循怙惡今底扶桑我疆我索伊河之清永奠北
條旁潤稼穡勿佚以驕維

皇敷文雲漢爲昭德水象之仰鑑九霄自古太史榮光
告堯斑斑馬圖其出匪遙海旣晏矣民樂作息蚤戶皎
人桑麻嶷嶷郡臺縣舟龍伯之國至於日域順

帝之則振舵旋鍼洋踰白黑來格祁祁拱茲

宸極於赫

至德高極於天深浹於淵與坤俱方與乾俱圓上下充
塞和氣盎然汪濊滂沛河海則焉是清是晏

皇德攸宣

皇綿寶歷於萬斯年

平定西域頌

謹序

臣聞威弧耀於列星光垂元象迅霆轟於盛夏氣轉洪
鈞是以因地制宜奮武與揆文竝重本天作則命德偕
討罪兼施厥聲厥靈殷歌采入有嚴有翼周美出征雖

其近在邊方猶且長垂雅頌若夫禹跡不到之土堯封
未闢之區達鞮譯於天垠窮梯航於月窟無侮無拂廓
地踰二萬里而遙于理于疆成功計四五年之速赫矣
煒哉書契以來曾莫一睹欽惟我

皇上

德懋執中

道隆建極

文武聖神以廣運紹

列祖之純熙

聰明睿知以有臨膺

上蒼之景命紫微正位獨幹璣衡赤縣神州咸遵道路
撫辰凝績治功既駕乎祁姚服教畏神幅幘亦超乎軒
頊固已南翔朱鳥北耀燭龍東漸鮫海鯤人西底烏思
鷲嶺歲時畢來貢獻血氣莫不尊親惟是準夷頑同苗
種丹浦一戰雖敗猶存黑水三危既分復合自矜絕遠
鑿空祇有張騫屢誘諸蕃屯田寧容鄭吉而乃爭先款
塞請

王師若望雲霓因之

命將出車執渠魁如拾草芥初經蒲類卽定伊犁旋斬
樓蘭更稱鄯善昆彌葉護俱欣敘於西戎安息康居總

效稱臣於

北闕大宛之駒汗血隨犀牛獅子以登閑于闐之石采
河竝琥珀明珠而接軫縱有巨猾莫遂姦謀奔兕誰留
封豨自斃攻馬耆而擊疏勒威懾百蠻殪突厥而奠龜
茲版歸四鎮玉門廣闢詎謂三絕三通雪海全空安知
十姓十設哈薩克占風納悃班列外藩布魯特向日輸
誠職侔蒙古斯則炎漢城置都護未窺德化之遐敷李
唐州屬羈縻難語威稜之丕暢矣逆曾大小和卓木者
醜獠遺類準部纍囚林將焚乎窮猿窟敢營乎狡兔我
皇上天幬絕漠電掃荒陲俾仍守其故巢爰特出諸禁

繫迺從阿賊竟肆陸梁奮螳臂以犯戎軒憑鼠牙而穿
武庫野無青草跡同蝨距相依邑若彈丸危類觸蠻偶
託雨露何私於長養翻內撥其根覆載方昇以生全輒
自作之孽豈非慕郅支叛漢倚都賴有五重城學文泰
慢唐誇高昌懸七百里者乎我

皇上應機善斷視遠惟明

金鏡高懸太阿在掌

特專閫寄擢上將於羽林

親授韜鈴簡精兵於神策張兩軍爲迅擊望之如火如
荼收六堡以擣虛勗矣爲貔爲虎捲蚩尤毒霧無地藏

身豎太乙靈旗有神默相直指流沙之外井自湧泉長
驅懸度而遙蹊成坦道於是平乘回部橫掩庫車遂克
阿蘇載收烏什穹廬雨灑盡消遊騎之塵甌脫風清早
有迎降之志莫不抗手屈膝簞食壺漿瑤池之春色先
催東僊西望濛汜之秋毫靡犯後舞前歌我

皇上馭以寬仁加之鎮撫易同文於泉府釐薄賦於花
門設官垂令甲之科計畝慰呼庚之願是則耕牧同遊
秦宇城郭共沐休光者也而二酋以漏網餘生謂負嵎
得計因而新附效指南之轍乃有雄師揚逐北之威捲
旆而行快逾破竹援枹而進力等摧枯親麾必勝之師

深入不毛之地賈其餘勇徑歷堅城彼方以逸待勞我則動有斬獲彼又以多圍寡我則靜待經營屹壁壘以山凝催簡書而星速突陣之金戈耀日地中鼓角皆鳴赴援之鐵馬騰霄天上將軍忽下遂乘時而肆伐士一乃心卽選銳以窮追人百其勇弓鳴霹靂困獸奚逃火烈崑岡妖氛自熄在二酋聳駭鹿奔觸耳皆成風鶴在諸部冰消凍釋驚心盡化沙蟲迢迢之戈壁旣踰我師尚挾雷公之怒處處之翎侯竝服遐陬原識

天子之尊久聞種落地遍虞淵今睹陂陀山名拔達方據鞍而草檄逆寇無藏將掃穴以犁庭罪人斯得乃諸

戎騎角爭爲設阱張羅而賀魯奔馳先已膏鋒染鏑血
不污夫

王斧傳首藁街捷自奏乎軍門枯尸疏屬然後收屬國
振

天聲驛馬雲飛凱歌風起我

皇上御太和之寶殿宜露布於彤墀奉吉語以承

歡介

慈闈而稱慶玉杓送暖正迴黍谷之春蒲海銷羨齊譜
饒吹之曲神人胥爲悅豫中外罔不清寧是蓋我

皇上決機發策羣議莫撓至斷也洞隱燭微幾先畢照

至明也開誠布信賞罰無私至公也制勝出奇綜畫有
素至豫也用能使膚功速奏聲教覃敷絕域來同窮邊
底績於是告成

郊

廟秩祀山川班爵策勳定期振旅聿下

明詔大沛

恩施

奎藻銘功不數燕然之刻春燈飲至載賡虎拜之篇凡
典禮所昭垂悉

宸衷所敷錫舍生俱臻仁壽寰宇永慶昇平是役也觀

光揚烈成

祖宗未竟之遠謨耀德觀兵創史策無前之偉業賓服
要服荒服王會攸圖懷方訓方形夏官是掌占成緯
地合幽明賜昧爲一家命對敷天綿祀貢享王於千禩
蕩蕩乎巍巍乎博厚高明悠久參乾坤育品物以無疆
者也臣以衰病際此

昌期誠懽誠忭謹拜手稽首而獻頌曰

聖武赫兮古疇匹仰

圓穹兮心與一神

廟算兮定西域大無外兮仁無敵

命虎臣兮授軍律踰葱山兮猶捲席殄兇渠兮獻俘馘
誓諸部兮底納日跨條支兮修貢職

頌正朔兮竝郡邑光

前烈兮善繼述年萬億兮矢

文德

侍御王良齋先生贊

并序

庚午夏召南舟過吳門謁先生於紫陽書院先生見召
南羸困甚曰一墜馬卽病同劉原父耶執手歛獻久之
時先生已病然語音洪暢臨別猶以羊叔子相期待固
惟恐召南之不久於人世也嗚呼孰知先生竟溘焉先

逝乎天台居萬山中歲游饑商旅罕往來者召南以病
居母喪杜門謝客於外事一無所知上年夏學使彭公
芝庭自台州試畢來弔召南始知先生卽世已踰祥禫
爲之大慟嗚呼先生學行爲海內儒林仰重者數十年
剛正之性終始不改於人少所與可而人莫不服有東
漢李范諸君子風官翰林久以著作自任甫入臺卽劾
僉人不可爲臺長丁艱歸卽不出公卿交薦不顧也先
生雖沒其可傳者自長在天壤召南今卽免喪舊疾未
少減寸步須杖始移不能走哭先生墓下勉爲贊語寄
先生子俾書於畫像時乾隆甲戌中秋也贊曰

維岳有華千尋拔地而削成四方維瀆有濟一線入河
而不雜於黃維我先生無慾至剛嚴氣正性莫之韻頡
廿年詞垣蔚然文章半月臺諫鳳鳴朝陽難進易退授
經於鄉雖人憂寂寞而我樂徜徉何享年不長爲士林
所共傷嗚呼先生其名孔彰爲人中之華與濟其高峩
峩其流湯湯

天然假山贊

井序

乾隆乙亥養病居萬松嶺嶺卽鳳凰山北麓簷前奇石
千百列隊爭雄雲湧波幻前賢題字甚多此天然大假
山也余於西岡拾雲根石數百枚滌去沙泥晶瑩奪目

擇寒芒最盛者爲小鏡其面平角方梢有凹突文似篆
隸行草及繪畫者爲小圖書餘則尖成峰圓成巒層疊
礫砢成巘嶠紆回曲折寬敞聳削成磴嶺陵阜峭壁玲
瓏成洞壑者學蘇公作供意就書几積累觀之近若湖
上遠及宇內名勝可閉戶而坐得遨遊之趣童子曰此
小假山視大者不尤勝乎余雖病不可無贊贊曰

囊括名山近羅几席卽鳳一毛跨鵬六翮作逍遙遊我
心實獲遠岫牕中數踰十百九華仇池名惟意擇夸娥
巨靈位隨手擲因而重之宜損宜益或縱或橫或黃或
白或雲紆青或霞標赤或鷺欲飛或星可摘或眉初掃

或掌乍擘或嶺鬱盤或岡巖積或洞呀呀或巒峇峇或
挺懸崖或臨廣澤疊嶂連峰方珪圓璧羣玉璘璠蓬壺
咫尺其氣熊熊其光奕奕昔賢所慕靈仙窟宅縹緲凌
虛萬里不隔圖詎聚米遊寧著屐移可學愚拜亦成癖
以嘯以歌斯晨斯夕盧敖神怡向禽願適奚出戶庭友
邀歡伯福地洞天皆遍足跡我思造物如易卦畫何洪
何纖一單一拆小石與山取象堪釋芥子須彌文包簡
冊岳兮鎮兮雄秀誰闢實天地中一卷之石作如是觀
仁壽無斁

天然圖書銘

郁郁紛紛今文古文我安能辨隨意所云如切如琢若
耕若耘不雕不飾有骨有筋似畫似畫非烟非雲蟲魚
鳥獸呼類引羣山川草木映日初昕其有奇字蠹簡典
墳其有異款鐘鼎夏殷不隸三倉焉識八分不數史籀
焉問右軍符篆自天請占靈氛岳形有真請詢葛君石
紋作印自昔未聞鳳凰山麓金牛水濱童子拾得我爲
欣欣縱橫綺合疑似絲棼惟忠惟孝辨當斷斷豈義能
畫豈秦能焚結繩以前體亦無垠染朱成譜元氣氤氳
象形會意滿目錦雲摩挲几上聊樂我員匪我克勤化
工之勳

答鄭侍講問

鄭名江號筠谷翰林院侍講嘗修一統志後督安徽學政回朝則志已告成矣

以書來問記其略

鄭問潞江卽梁黑水西洱河卽此水否

答曰謹按西洱河之上源亦曰黑水河出浪穹縣北南流逕縣東北左受梅茨河白沙河二水又南瀦爲澤逕縣東南有鳳羽河自南來注之又東南流逕鄧川州北岐爲二又南逕州東南合爲洱海又南逕大理府城東又南至下關折流而西逕合江舖西南與西北來之漾澗水合下流入瀾滄江此其去潞江甚遠發源甚近可以指爲梁之南界不可以爲雍之西界也

問然則瀾滄卽禹貢黑水乎

答曰瀾滄發源鹿石卽今西藏格爾吉匪噶那山直河源西南四百餘里直金沙江東流處南七百里直金沙江南流處西百餘里凡鹿石山以北之水皆流入金沙江金沙自犁石發源東流至河源西北之巴顏喀喇山已二千餘里矣夾江南北皆層巒綿亘雍州之黑水豈能越金沙踰重山而南乎哉李元陽以瀾滄爲禹貢黑水吾不信也

問然則源流最遠莫如大金沙江今拉藏所謂雅魯藏布江矣可當禹貢黑水乎

答曰禹跡雖遠不能度數千里窮荒之地以爲雍梁二州之界也張機黃貞元之辨核矣按以地勢則不確

鄭問然則黑水不可考乎

答曰黑水之名以色其委入南海其流經雍梁之間今且以山川現在者懸度古人之疆界禹時西被於流沙流沙自雍州西北以至河源金沙諸源之西皆平沙數千里不得云雍有流沙梁無流沙也今潞江水色深黑本名烏江在金沙之西大金沙之東源出藏地布喀池池廣五百里西北流爲厄爾几根池又東北流爲衣達池又東南流爲喀喇池華言黑湖也地廣百里從池南

流出爲喀喇烏蘇華言黑水也稍東北流折而南又東南逕怒夷界亦曰怒江又南入麗江府界計自發源至此三千餘里又南逕野人界又南逕永昌府及潞江安撫司境又南逕緬甸國又南入海明一統志謂源出雍望輿圖西番之西大流沙之南湧出一澤名曰嘉湖南流爲潞江卽此水也但明時於番地不能詳悉今按地經度布喀池當西二十五度其西南山外有大池周千餘里積水不流其西北山外卽大沙海有一河自西南而東北約七百餘里而止土人曰雅勒蘭藏布河河南有澤十餘大者周百里皆沙磧中渟澗不涸去布喀諸

池不遠此其爲禹貢黑水乎布喀池直河源西南一千
八百里其東流折而向南之處曰索格薩馬橋直河源
西南僅七百里雍州西境包崑崙積石而西距流沙不
得云烏江非禹貢雍梁二州界也三危自古原無確證
爲地爲山爲水俱不可知謂三危山在敦煌則始於水
經而詳於括地志然敦煌竝無有水南流能越雪山而
逕沙海者漢志於禹貢某水某山一一明指獨於黑水
三危不言何地安知烏江所經之諸山非卽禹貢所名
三危而後世失之者歟烏江在雍州西南梁州正西自
三危以北屬雍三危以南屬梁亦可謂跨越二州之地

矣後世言雍州黑水必向酒泉敦煌尋覓亦知南隔河源諸山斷不能越則又有繞出河源之西及伏地潛流之說豈知敦煌之南卽限以雪山雪山先不能越況能經流沙而繞出河源之西乎河源不能越況於金沙夾岸諸山又在河源之西千里乎水固有伏地潛流者濟是也禹貢於濟或伏或見鑿鑿言之於黑水不言其異直曰導日至日入而已何所見而以爲伏地潛流乎哉潞江水色深黑源遠流長在大沙海之東固不必遠求敦煌之有無黑水也

鄭問然則三危在敦煌非歟

答曰孔傳第云三危西夷之山耳水經云三危山在敦煌縣南於是始有其地漢敦煌郡今沙州衛卽左傳所云秦人追逐姜戎之祖吾離於瓜州及允姓之姦居於瓜州也者杜元凱注亦云在敦煌魏書太平眞君六年討吐谷渾杜豐追被曩度三危至雪山生擒之夫雪山在沙州南百餘里西自噶思池之西而南而東綿亘沙州安西柳溝靖逆之南又東南統肅州甘州涼州之南層巒疊漢冬夏積雪不消卽古祁連山也依魏書則三危山尚在雪山之北而沙州近流沙西卽白龍堆西北望蒲昌海已爲雍州最西之地是以括地志直云三危

山在敦煌南三十里山有三峰故曰三危俗名卑羽山
顏師古注漢書亦云黑水出張掖雞山南流至敦煌過
三危山又南流而入於南海也按張掖卽今甘州甘州
諸水皆西北流逕酒泉而北入居延海何嘗有一水西
流逕酒泉能越弱水羌谷二河而西至敦煌者耶云南
流至敦煌尤誤之誤者也今按嘉峪關外西至噶思水
最大者曰布隆吉河卽漢志南藉端水也曰黨水卽漢
志氐置水也布隆吉源發雪山之陰北流而西與黨河
會又西注於哈拉池其長七百里外此雪山之北爲川
爲澤雖多未有著名者三危之山卽可過雪山連峰不

斷凡水泉出其北者無不北流又何以越而南也故謂
敦煌有三危山可也謂敦煌三危卽禹貢黑水所逕之
三危則不可也

鄭漢時大夏烏孫大宛今在何地大宛是撒馬兒
問罕否唐之波斯是漢僭支否今策妄庭卽金微府
否

答曰按烏孫卽今策妄地漢書云烏孫都赤谷城東匈
奴西大宛西北康居南接城郭諸國策妄之西界或并
有大宛康居之地所不可知其庭則漢之烏孫隋唐之
西突厥也而南跨天山以至鹽澤由鹽澤西南以至于

閩河之源踰葱嶺以西蓋包有車師前後部焉者龜茲
疏勒諸國之地而南接于閩自元以後西域國土山川
名號盡變古人之舊難以臆斷自大山大水自古不能
轉移今可爲證據者一曰天山亦名北山又名白山雪
山自葱嶺而東橫亘疏勒龜茲焉者車師前王之北而
東盡於伊吾廬之東北唐書所謂折羅漫山也一曰葱
嶺河東南注於鹽澤鹽澤亦名蒲昌海今之洛普池也
葱嶺河後魏曰計式水今名海多河此水經疏勒龜茲
焉者車師前王之南一曰于閩河亦曰玉河今之塔里
母河也源出葉爾欽山中東北流幾三千里而與海多

河會又東注洛普池卽漢書所云鹽澤水潛流地中爲中國河源者也一曰葱嶺自天山極西處與葱嶺接其嶺自極北而南而西南幾三千里凡嶺以東之水皆東流會於鹽澤嶺以西之水皆西流注於西海今葱嶺之去西海道里遠近不可知而其水之西流一一可數也海多河源之西北有空濟塞色河有昌馬河發源嶺西西流二百里而合爲衣里河又西北二百里有特克思河自西南來會又西北二百五十里有大水自東來會又西北百里有大水自西南來會又西北百五十里有活羅郭思河自東北來會又西北七百里瀦爲吞七思

池池周二百里此西流一水也其南七百里有曲河出嶺西西北流屈屈而經瀚海幾一千三百里此西流二水也其南七百里有搭拉河自嶺西西北流約一千里瀦爲西七勒里克池此西流三水也其南九百里有特因多博河自嶺西西流二百三十里又衣楚他什河西流與東來之厄塞滾河合西北流四百里其西百五十里有西拉河自嶺北西北流四百五六十里此西流之小水無數也今策妄庭直土魯番城西北一千五百里西北有河自其南大山中北流而東與西北來之波羅搭拉河合又東瀦爲波羅搭拉池池周百餘里在庭東

北三百里而天山前之海多河直庭前八百餘里故曰漢烏孫隋唐西突厥地也在明爲亦力把力國之北明史謂北瓦刺東火州南于闐西撒馬兒罕是也至撒馬兒罕則又在于闐之西矣

漢大宛今在策妄庭之西按漢時出大宛之道自車師前王庭隨北山波河西經焉耆龜茲以至疏勒踰葱嶺而西卽休循國自休循西行九百二十里至大宛是在策妄庭之西也明之撒馬兒罕是漢時罽賓國在大宛之南非大宛地也

漢大夏在大宛西南爲大月氏所據有五翎侯後魏時

諸部猶存而吐呼羅國卽古大夏地故唐書曰吐火羅
魏吐呼羅居葱嶺西烏澗河之南卽古大夏地也今在
策妄庭之西南界

漢條支國近西海於西域諸國爲極遠前漢使者祇至
烏弋山離未有至條支者後漢班超始遣甘英至其國
臨西海而還魏書曰波斯國卽古條支隋書曰波斯國
在達曷水之西蘇蘭城卽條支故地唐書曰波斯國西
南皆瀕海是也

今策妄庭卽唐之崑陵濛池二都護府平西突厥賀魯
所置策妄庭北之波羅河當卽多邏斯川
唐書所云直西州北千五百里者也兼有安西都

護及龜茲焉耆疏勒毗沙四都督府地

在天山以南于闐河以北而西

至葱嶺

至於金微都督府原以僕固部置則與堅昆龜林

相近其地蓋在今喀爾喀西部杭愛山之北與鄂羅斯接境不在西域也計自杭愛山西南至策妄庭尚相去三千餘里而中隔瀚海焉

答阿侍郎問

阿名克敦字立恒滿洲人官吏部左侍郎爲一統志總裁嘗奉使西北諸屬國

阿嘗踰哈密北天山地名碑嶺積雪中見斷碑有唐貞觀字此何碑也問土人皆不知西域志亦闕如也

答曰此唐侯君集平高昌紀功碑也君集以貞觀十三

年拜河道大總管伐高昌十四年降其王麴文泰唐書
言君集刻石紀功而還高昌尚在哈密西八百里此則
班師踰嶺時所刻矣

阿據元史都實始窮河源在星宿海然則自元以
前竝無至大崑崙者神禹導河積石固近在河州
耶

答曰今河州西之積石自後人名之非禹所名也大崑
崙卽古積石在塞外二千餘里其下卽星宿海漢時爲
羌地唐初爲吐谷渾地段頗追羌行四十餘日至河首
積石山侯君集隨李靖平吐谷渾追至星宿川達柏海

北望積石山觀河源之所出劉元鼎使吐蕃訪河源得之於悶摩黎山亦卽大積石也可知漢唐時已知河源但自星宿以下曲折次第則都實爲詳悉耳

答楊學士問

楊名椿號農先官翰林院侍講學士初修一統志後同修明綱目

楊問參合陂卽今大同之天城否統萬在河套內今何地

答曰按漢參合縣屬代郡水經注敦水東逕參合縣故城南敦水今在大同陽高縣南東北流入天鎮縣西入鴈門水則故城在陽高縣東北天鎮縣西南也而北魏始興之參合陂在天鎮縣邊外正黃旗察哈爾地有兆

哈河南會諸水從新平堡流入邊牆曰東洋河卽古于延水也參合陂與于延水相近故天賜五年如參合陂觀漁於于延水也

赫連勃勃統萬城在黑水南延奢水之北今河套鄂爾多斯右翼界內有大澤蒙古名喀喇烏蘇華言黑水也延奢水今日石羔川河蒙古名額渾圖東南流入邊牆爲榆林無定河延奢水北是統萬故地也西距寧夏南距榆林俱不相遠

楊問狼居胥山在今何地浚稽山今屬何部落天山今出口甚近卽此天山抑別有天山耶

答曰狼居胥山當在大同直北度漠爲今喀爾喀東路
之大山霍去病出代二千餘里與左賢王戰封此山禪
姑衍臨瀚海而還是匈奴東界山也今地圖謂賀蘭山
之北河套白塔之西爲古狼居胥山誤矣豈有兵出代
郡反沿邊而西以至朔方北地之境乎狼居胥山今不
可考所可知者在漠北喀爾喀之東路耳

浚稽山在今喀爾喀中路鄂爾昆河之南直漢朔方北
二千里直居延塞北三十日行以趙破奴及李陵戰處
爲證則翁金河卽龍勒水翁金之北杭亦哈馬勒山卽
浚稽山矣

天山塞外處處皆有凡蒙古名騰噶里阿林及翁公阿
林者皆天山也其最近者歸化城東北之天山然此乃
古陰山耳漢天漢四年莽通將四萬騎出酒泉千餘里
至天山又西域傳卑陸蒲類且彌劫國皆依天山而都
此古天山也在匈奴西南其南爲車師焉耆龜茲疏勒
諸國亦曰白山亦曰雪山亦曰北山又曰伊吾北山蓋
西自葱嶺綿亘而東以盡於伊吾廬之東北長數千里
今哈密城之北巴里坤池之南層峰疊嶂西接土魯番
又西入準噶爾界古天山也

楊問哈密是伊吾廬地前漢何名漢敦煌今何地玉

門陽關何在

答曰哈密卽伊吾廬地舊志已詳此地前漢尚屬匈奴故其通西域之道由玉門陽關而北向車師爲北道車師前王庭固在哈密西一千二百里也後漢永平中始取其地於是匈奴益弱威不足以制西域後世通西域者皆自酒泉敦煌北至伊吾自伊吾西至車師前庭路尤至便後書謂伊吾高昌爲制西域之要地然哉漢敦煌今沙州衛是布隆吉河南北哈拉池以東皆古郡地也玉門關在沙州西北三百餘里陽關在西三百餘里由此而西爲噶思池卽古鄯善諸國由此西北爲洛普

池卽古蒲昌海所云鹽澤者矣

楊問疏勒諸國今爲回回所居否

答曰今土魯番地全係回回其西皆屬策妄亦回回之民居半又西南至于闐河之源有葉爾欽國則人皆回回矣南懷仁坤輿外紀稱西南有回回大國理或然歟

任待菴傳

任公名辰旦字千之待菴其號也世蕭山人幼奇慧與同邑毛奇齡王先吉韓日昌學同師稱四傑俱以文名而公才行高出諸人右順治丁酉舉於鄉從外氏籍曰韓燦丁未成進士復今姓名丙辰除江南上海縣知縣

縣故稱難治當吳淞之委負海多豪猾戶十餘萬歲租
不下四十萬漕復半之前令九人皆累繫獄公至勤聽
斷自奉儉約如諸生視百姓如家人子弟催科以時不
大用鞭朴百姓感其仁輸將恐後新令撤海濱防軍公
慮其乘閒至剽民財也密請將軍行期故邀軍主歡飲
宣言期須稍緩次日將軍忽下令促卽行公厚具牛酒
道上勞軍軍毋敢遷延他顧居民帖然黃龍浦爲吳淞
巨口嘗建閘屢圯兩岍築塘費不貲工訖不就公倣浙
之爲梁者命匠先範石於陸連比若長堤第其次入水
募善泅者暗記累水中悉合矩度如陸廣左右護堤束

水就開水不橫溢開始固公性稍迂月必書所行事告
城隍神有疑獄嘗占夢剖決發姦摘伏民驚爲神公政
聲日著當遷督撫以公擅文名舉應博學鴻儒報罷歸
故職乃破例不論逋賦以劇縣良吏特薦

聖祖可之行取入都癸亥補工科給事中公感知遇連
上五疏請酌蘇松賦額以遂民生預籌經費以貽良法
慎用人以肅紀綱核廉食以飭吏治酌藩司護印以重
憲職言皆切直遷兵科掌印甲子典湖廣鄉試時稱得
人丙寅內轉改大理寺丞丁內艱歸遂不出年七十卒
於家有介和堂集行世又所著言近錄一卷門人湘潭

陳鵬年爲公典試時所得士傳其學初公與毛奇齡齊名奇齡文學冠海內於士友少與可獨敬公作上海縣集課記自翰林歸蕭山又爲公作行狀謂公生平才行不愧古人云子孫皆能世其家孫元文以進士教授嘉興與余善

周白民小傳

先生名振采晚自號菘畦海內言時文者無不知有山陽周白民先生白民其字也先生性孝友幼卽端謹好學得祖父歡年十五入郡學試必冠其曹困躓棘闈者數十年竟以選貢老然淮海言經學品行彷彿古人者

必曰先生初家豐裕弟瞽聽讒言求析居先生悉推產
與之後弟產屢破時朋贍之撫猶子如己子先世有孝
子思親樓事載府志先生購遺址建家廟奉孝子耐族
黨義之生平朴誠恬淡視勢利聲華得失毀譽人情欣
戚百變泊如也與人交人皆服爲飲醇至於節行之大
一意孤行毅然不可奪尹公博野嘗稱曰進止不愧儒
者近世文人中罕見自幼至老寢食書卷中研精覃思
自標清醇一格於前明章羅陳艾之外凡數百篇方公
望溪稱之至不容口方朴山先生曰白民經學不必盡
逮古人而能到古人之所不到其於史不喜觀大意而

心解處出人意表乃適得人意中士林以爲確論白民
選貢後督撫以孝廉宏詞及經學三舉應

詔皆不就家居待選教職自訂其已刻文存數十篇卒
年七十

忠節靜菴公畫像記

先忠節公以駕部殉土木之難景泰改元褒卹文武死
事諸臣公得贈官賜諡廕子招魂葬衣冠於其鄉而于
公殉難之懷來縣則建顯忠祠崇祀之當是時公長子
諱廷輔歸公喪撰公行狀者同郡郎中林公灝誌墓者
泰和祭酒蕭公鉉也成化中同邑布政龐公泮方爲諸

生倡議祀公於鄉賢公次子舉人諱廷臣建繼武坊竝
乞永新內閣劉公定之爲公像贊正德中解無爲州教
職歸鳩工建家祠董其事者公曾孫諱望霞玉霄者也
嗚呼天地間正氣萬古不磨惟忠與孝我齊氏自南宋
始祖宣義公遷天台傳七世至公又十二世至於今綿
綿延延益以光大豈非天所以報忠孝者久而愈新遠
而愈熾乎哉我

朝康熙中巡撫高安朱公軾建清聖祠擇台郡先賢爲
之配公與杜清獻方正學陳恭愍諸公與焉雍正五年
詔郡縣竝立忠孝祠吾邑推公爲首乾隆初

恩詔天下修先賢祠墓部臣督撫論核甚嚴吾邑惟公與徐竹溪先生奉

勅有司防護於是忠節公專祠益顯至懷來顯忠祠以召南宮翰林時荅直隸督臣書據明實錄正史條列姓名祀典俾勒石廟中具載宣化府志今公舊像日久破損迺更摹新像張設丹青炳然若劉文安公讚已錄舊像之上不復贅

浦江縣重新學宮記

聖朝右文致治超邁前古環海之內道一風同雖山陬僻壤人知慕學而浙之浦江爲婺州屬宋元以來人材

蔚起代尚儒術則學校之事因其地而作興之尤良有
司之責也乾隆丙子秋重修浦江學宮成文學戴君殿
海走杭請文刻石示來者余於是益歎學校足以復人
性而成人材上爲國家職官任使之用下爲鄉黨閭里
風俗之型惟在正人心鼓勵其志向於學則道近在
倫常日用教近在五經四書由教入道近在學問思辨
篤行士希賢賢希聖如掘井者必得泉豈果難知難行
哉卽此學宮之成經營創始於前積累勿替於繼不辭
艱瘁而事歲功成其明鑑也浦學在宋三徙至元再修
記之者前有唐仲友葉味道後有柳貫戴良其遷今地

在縣治東南始於明正德中記之者有章楓山懋舊誌
具載之自萬歷十四年後積久未修地卑窪多白蟻穿
穴棟宇朽腐春秋釋奠有司行禮惴惴乎惟覆壓顛越
是懼師儒亦僦屋別居諸生無弦誦講習所義路禮門
鞠爲茂草蓋百有數十歲矣何侯始至慨然曰屋旣無
可修盍改作乎吏數以費不貲對侯與博士方君岱濟
集邑中士夫捐資爲倡皆欣然踴躍爭輸庀材而鳩工
焉以乙亥秋建大成殿侯曰斷蟻當清基本因故址下
疏暗溝增甃五尺培高築厚厥土燥剛南移戟門三丈
許繚以迴廊上屬左右兩廡庭墀廣平勢始延敞櫺星

柱半傾折易以新石殿後曰崇聖祠明倫堂敬一亭尊
經閣旁曰名宦鄉賢兩祠教諭訓導兩署皆以次修舉
侯志興學校其勇如此噫士能以侯之志勇於所學詎
可量耶俗學之弊也高者流入於異端卑者汨沒於功
利粗解訓詁卽務勦襲浮詞倖希科目日對聖賢之書
究不知所學何事雖所性原與聖賢不殊而始拘於質
中囿於習終安於暴棄自畫實理不察實行不修無他
志不先立故也浦雖小邑山有仙華寶掌青蘿九靈之
高且秀水有浦源匯羣溪爲越三江之一自昔鍾毓名
賢如宋文憲人物志所列政事文學忠義孝友炳炳烺

煇足垂不朽其最著者如方吳柳宋戴鄭諸公卽使孔子猶在亦當在七十子之列論者動謂浦邑近日人文之衰地運爲之亦思天不變道亦不變浦陽山川猶是地果有變歟否歟今者學宮之成材不賦而羨匠不徵而多事不勞而集然則學以致道反求諸身勇於復性以成其材志之所至氣亦至焉體立用行功崇業廣自旋至而立效未見有力不足者也是役也名曰重修實同建始浦陽人文其復振矣乎侯名子祥福建侯官人知浦江多善政余病不文惟取古人勸學之意書於石以勗多士

重修講約亭記

鄉有亭以息行旅以識郵傳以備徼巡以占山川原野
遊觀之勝凡古人創置義各有取況夫地有類乎術序
黨庠制暗合乎閩胥比長教甚切乎倫常日用化漸積
乎歲時勸戒目見耳聞習與性成人無邪慝如太平東
南濱海六都之團浦左接新河金清右通松門舊衛中
道有亭舊傳爲先民會講鄉約處其子孫遞衍數村聚
族而居煙火相望繁庶甲於一邑身逢

聖世累洽重熙鯨波久靖革偃烽銷禮教振興戶多康
阜其可坐視斯亭湮沒於荒郊茂草閒耶此文學林生

芬所以自書創置修建本末遠詣天台介陳生來謁句
余顏其楣而文其石也亭始建於前明宣德六年專爲
講約至孝宗時親遜成風賢才蔚起一時號君子鄉鄉
約之講不異古師儒說經少長咸集其約正曰林本曰
江誠其副正曰毛清曰林植曰江暘曰徐紹皆以隱君
子爲時矜式紹字子文學行尤高嘗手編規則四條至
我

朝康熙年閒鄉人猶有舉其會者以斯亭固巋然無恙
也後因颶風亭圯耆老每過其地流連故蹟感慨係之
林生以白峯後裔與同鄉士君子謀重建先白邑侯趙

君趙君卽允其請庀材鳩工不數月亭成講約既有其地又有其人從此遵先民規則啟迪後生各勤職業共斥惰遊杜放僻邪侈之根源修孝弟忠信之實行以正人心以厚風俗皆斯亭講約實效其視他鄉古亭僅在息行旅識郵傳備徼巡占山川原野遊觀之勝孰輕孰重豈待智者而知其不同也哉是爲記時乾隆丙戌仲春之吉

家大宗祠碑記

古者宗法與治法相維尊祖敬宗教族人孝弟親睦莫重於廟廟之制視爵列高卑祀視田祿厚薄所會子姓

遠近視世系後先其最明者姓統同而氏別異雖在士庶一廟及奠於寢者宗法亦井然不亂周初封魯衛殷民六族七族封唐叔懷姓九宗是也漢後以氏爲姓自天子諸侯外無世爵祿公卿大夫祀其先亦不能如古禮於是郡縣著姓始合族爲大宗祠奉始遷者爲百世不遷之祖其餘支分派別各爲小宗凡春秋祀事必先水源木本則亦尚存古人大小宗之遺意關係風俗人心至深且鉅也我齊氏本家汴之祥符隨宋高宗南渡自杭遷居天台之城隍廟前台人稱曰殿前齊則自寶祐開宣義郎徵遠公始公二子後竝蕃衍科名仕進發

聞於鄉者代不乏人至今二十有一世矣當明初吾族之移葛姥歡舉移水南者皆有小祠其世居殿前左右者曰後園曰前園蕃衍實甲一族亦各有宗祠一則後園祀駕部忠節公一則前園祀介賓可泉公祠相去僅數十武台俗上元必合懸先像於總祠如古祫祭禮吾家以忠節祠隣社廟上元燈最盛遂爲會祀地像多屋淺至不能容恭遇

聖主恩詔命督撫核所部先賢祠墓官宜修整者上聞吾台以忠節公應有司歲加防護族人乃慨然曰專祠褒忠薦

國家盛典若仍曾祀無以顯忠節公蓋卽舊祠拓基作堂以伸妥侑乎議旣定經始於辛未秋月今夏告成大堂三楹東向中奉始祖配以二世至五世祠左一楹專奉可泉公前園諸祖咸祔存舊迹也右一楹奉水南上下齋及大潢葛塘葛姥歡輿之祖及神主無依者以收全族兩廡南北向各三楹自六世以後冠帶者昭穆列次前爲大門臨石溪面黃榜煥然翼然几筵祭品畢具召南方養病於杭之萬松岡兄河洲書來曰宜作記於乎爲宗祠亦難矣吾台氏族大半始於南宋厥後或盛衰轉徙不常惟吾齊氏以忠厚朴誠爲教使後人循循

謹守禮法不敢逞才智自雄安分務勤儉漸至豐裕自
宣義公以來五百餘年閒里居廟前者綿綿相承勿替
家詩書而戶衣冠卽愚陋如召南亦得列翰苑躋秩卿
貳豈非祖德深厚之垂裕無疆也哉詩曰無念爾祖聿
修厥德是當爲世世子孫勗也乾隆丙子仲秋第十八
世孫召南謹記

仙巖重修大忠祠碑

天地予人以靈於萬物之性使亘萬古而不易者曰綱
常而已矣其同於萬物隨時變易使人有苦樂壽夭國
有盛衰興亡亦若寒暑之有遞嬗草木之有榮枯氣運

轉移雖天地亦不能以復挽而忠臣義士乃於國之既
亡冒險圖存蹈死如歸經百折不少挫豈非當時人心
所共指爲逆天者耶然其生也一息存其國雖亡不亡
不亡者其寸心也其死也國雖亡其寸心實不死不死
者萬古之人心也天地不能自挽氣運於一時特生一
二人樹君臣之準的以留綱常之不易者於萬古如宋
丞相信國文公其人也臨海東北百二十里濱海地曰
仙巖洞壑奇秀德祐中公自揚州浮海至此糾合義旅
圖興復明嘉靖時里人葉炎鄧景張拔等建祠祀公配
以杜公澣張公和孫胡公文可呂公武春秋享祀不懈

事具志乘又有大忠祠錄備載田畝文移及碑記詩歌
國初因海禁遷居民田散祠廢享祀始缺乾隆五年諸
生葉玉林等重加修葺今棟宇神像器物翼然煥然學
使雷公鉉及守令俱爲守祠道士再刻祠志余門人傅
有光奎光兄弟請余爲文勒諸石嗚呼爲臣如公雖荒
陬僻壤婦人孺子武夫徒卒目不辨史傳者亦莫不熟
聞姓名如親睹其忠烈敬之慕之其祠在海內如廬陵
燕市甌江閩嶺所在多有而仙巖爲公所嘗信宿與義
士杜張諸公詩篇激昂遺跡赫赫官吏士民有不入廟
知敬聞風而興起者哉公丁宋季所遭際何如其苦所

樹立何如其難也而公矢志不易上與日月爭光下與河岳竝壽我

朝重熙累洽治越前古敷天共慶升平之盛邊海銷烽臥鼓者百餘載矣人生光天化日中食德飲和安常處順仕者勉爲賢臣爲循吏爲正直奉公爲清勤盡職處者以詩書禮義勉爲善士孝弟醇謹勉爲良民型仁講讓馴至俗美風淳斯不亦時之甚樂而事之易易者歟是祠也振厲風教合古法施於民之祀所關於萬古綱常者甚大前後捐輸姓氏宜備載之至迎享送神用樂公自有正氣一歌聲滿天地士可吹竹彈絲合其音

節以和神聽感人心也

八人

命賦

詩

寶綸堂文鈔卷之四

寶綸堂文鈔卷八

天台齊召南次風謨

無錫秦

瀛凌滄校

沈母查太君墓表

嗚呼此吾友仁和沈廉使賢母查太君之墓也廉使自河南入覲以太君老乞歸養歸數月太君歿距贈公東隅府君之葬十有餘年矣廉使兄弟請召南文表其母墓不可以不文辭謹按狀太君查氏海寧園花里人父詹事府少詹事諱昇負海內文章重名母贈夫人陳氏少詹愛女如子未第時遊杭州奇贈公所作文卽以太君許字招公爲贅壻太君歲時來杭奉侍舅姑甚謹少

詹旣入翰林畱太君與兄嫂共理家政巨細悉合程度
內外雍睦無間言舅姑病隨贈公歸家旣貧又先後遭
喪太君盡脫簪珥爲喪葬資盡禮致哀鄉隣傷感少詹
官日起入直

內廷呼贈公太君至京師少詹卒遺命三子析產與太
君均太君固讓其隨喪南回也止受田一區屋數椽於
宛虹谿上凡查氏稱賢孝女沈氏稱賢孝婦必首曰太
君太君生三子一女以身爲教一言動必有法課督較
贈公尤嚴贈公由

武英殿纂修出知廣東之文昌縣以剛忤上官罷謫寧

夏而沒也二十年間三子奔走萬里更代趨侍經營太君則畱家日率諸婦躬操作教童孫經書諸孫女女工刺繡無片刻閒論者謂艱難憂患時能持門戶使蹶而復振太君力也贈公諱元滄

誥贈朝議大夫某道監察御史三子皆賢而有文長曰廷榿府學生次日心縣學生季曰廷芳卽廉使也以博學鴻詞官翰林編修改御史轉守山東登萊青道擢河南按察使一女適府學生查奕松孫男四曰國學生世煒曰世燕曰世炯曰世炆孫女七曾孫二曰守中曰守正俱幼太君初以夫貴封孺人後以子貴封太孺人

晉太恭人卒於乾隆乙亥九月十九日距生康熙六年十一月十日年八十有九今卜某月某日合葬某鄉之原召南年家子也曩於都門修登堂拜母之敬今太君歿矣太君生前嘗蒙

聖天子寵錫壺範遐齡四字顏其堂一時榮遇罕有倫比而太君之賢亦有非尋常閨闈所可及者爲文以表其阡俾後人傳列女者有考焉

程太淑人胡太君墓表

程與胡俱杭名族太淑人處士胡勝殷女文學贈通議大夫程聲士諱鉉之元配也幼嫺禮教習女工年十六

歸程事舅甌山公姑范孝謹甚得婦道時家苦貧甌山公遠游陝豫文學方奮志下帷姑范以針刺佐膏火太淑人家本富亦能躬井臼勤紡績若素貧者宗黨共稱其賢丙戌隨甌山公之湯溪學署側室錢淑人生臬使四年文學卽世又五年甌山公卒於官臬使甫九歲姑范挈家屬歸杭家徒壁立太淑人茹淡力勤養姑鞠子艱辛萬狀錢淑人以盡瘁致病不瘳太淑人相抱大哭指臬使曰程門十四世皆秀才汝高祖含譽公官止縣令德澤蘊久必發其在兒乎姑范疾篤侍湯藥七晝夜不寢不食范睇臬使曰汝母孝必能見汝有成也臬使

既補博士弟子員娶金氏數年病卒遺子女各一衣食
教誨皆太淑人身親之艱辛視前尤劇臬使以戊午舉
於鄉壬戌試授內閣中書歸省復娶胡氏旋入軍機隨
經略傅公平定金川畱視江工營伍還都卽迎太淑人
就養改武選司主事遷員外郎至乙亥西陲用兵特擢
甘肅洮岷道又迎太淑人就養於岷監司實駐肅州去
岷幾三千里軍需出關無虛日以故歲僅一馳省太淑
人執手垂涕誠曰汝四歲喪父今至五十而我已八十
矣 國家用汝作監司經理要務倘絲毫不盡心致獲
罪戾我其漂流萬里外耶汝速行無爲我畱及西師竣

又出關閱實諸部屯田半年始畢將再赴巴里坤太淑人三以手書促之歸曰五年軍旅幸無誤汝亦可以報命矣總督楊公代奏得請改發江南遷安徽臬使太淑人自金陵至皖城見四方赭衣者日集誠臬使曰汝所訊罪皆實乎若無所平反

朝廷亦安用汝人之生死不可不慎也聞者悚然嗚呼古稱賢母多矣若太淑人一生在困苦劬勞中撫孤立教動合經典處貧乏而心安居榮祿而知懼循職分而思報

國勵志操而忘浮華是古賢母中之卓卓者臬使其亦

可謂孝子哉太淑人以某年閏五月十一日卒享年八十有幾子一卽臬使燾孫二曰承獻國學生曰楷孫女一曾孫三曰炳曰烺曰炯曾孫女一太淑人之合葬距聲士公墓成又二十六年矣臬使乞召南文表石而系以銘銘曰

節苦而甘人所不堪教慈而嚴古所難兼嗚呼賢母德深且厚視此貞珉以垂永久

舅氏張鳴謙先生墓誌銘

舅氏既沒三年召南以父喪家居表兄弟造苦次告曰先府君既卜兆宅願有銘召南哭辭則請於母母泣命

執筆爰拔淚書其略先生諱正吉字孟藹自號鳴謙姓
張氏世居天台溪南之茅園遷邑治官基自明都御史
諱文郁公始卽先生高祖也曾祖諱元聲明刑部主事
祖諱亨梧高隱不仕學者私謚介靖先生祀忠孝祠考
諱利璜歲貢生候選訓導妣陳氏生先生兄弟三人並
以文章行誼繼踵祖父聲震郡邑先生自幼通敏異常
兒爲文自標新穎曲阜顏公督浙學拔冠弟子員有國
士之目先生益自勵下帷力學文譽日顯丁酉癸卯弟
次雍季題兩先生先後登賢書而先生食廩於官竟以
名諸生老先生才識明果雅自負經濟治家處事規畫

井然議論古今成敗得失洞若觀火既屢困場屋出餘
技營生產致富不貲然至老讀書尤不倦鄉人莫不服
其才而惜其所蓄未展也事母陳太夫人奉養備至次
雍先生早逝撫其孤如己子季題先生之卒於房令也
不遠數千里迎其櫬以歸鄉人言孝友者以先生家爲
最先生元配王氏繼室謝氏皆婉順盡婦道族黨稱賢
王氏生子男三仁憲國學生仁安仁宓俱邑庠生女二
長適邑庠生潘炬次適召南孫男六庸禮邑庠生餘俱
幼先生以乾隆壬戌二月卒距王氏十有四年矣今以
甲子十一月合葬其地卽王季重尚書評台山所謂瀑

布嶺下數家者也先生遊山每過之必徘徊不去曰吾當築室於此今果然銘曰

左桐柏右仙源山峩峩水浚浚願隱邁軸矢勿諼先生雖沒其言存新阡卜此繁後昆

外王父明經張府君墓誌銘

外王父熊卜張府君歿之二十七年而外王母陳太君卽世前後所擇地俱未協至今年冬其孫仁憲始獲厝桐柏西巖先塋之東召南以母憂家居扶病卽紼共請文刻於石謹條世系本末而綴以銘系曰張氏台望族世居茅園其遷官基自明右都御史工部侍郎諱文郁

與夫人汪氏始卽府君曾祖也祖曰刑部主事諱元聲
妣曰謝氏考曰介靖先生諱亨梧妣曰湯氏府君諱利
璜字涓夫號熊卜以順治十三年五月十四日生自幼
聰敏異常兒孝友天至稍長奮志爲舉子業提學祖公
拔入郡學食廩膳歲科試輒冠其儕所爲文時爭傳誦
弟子受業者半庠序困於場屋竟以明經終士論惜之
外王母陳太君性賢明教子治家並足爲閨闈法邑庠
生諱良表長女也生與府君同齒乾隆五年七月八日
卒年八十有四嗚呼自都憲後子姓繁衍台人言家學
者必首官基至府君有三賢子英才軼羣聲名益著使

天假府君年得與太君並豈不親見積善之慶乎哉長
廩生正吉以勤儉復祖業次舉人候選知縣正宮以宿
學著書儒林稱之季舉人房縣知縣正品屢宰劇邑稱
循良此皆府君朝夕手課鄉人所指羨者有女子二長
卽召南母太夫人配吾父封翰林省齋公次適謝元翬
當太君七八十歲時家門日盛內外孫曾蔚起舅氏年
俱未老豈知天倫樂事之不可以長得耶今舅氏旣皆
捐館吾母太夫人亦卽世此召南執筆不能不泣下沾
襟也嗚呼爲善者必有後在府君福不稱德雖有賢子
亦未大顯天之報施其或愈積而愈隆乎孫八太學生

某某曾孫十四庠生某某元孫二葬之日乾隆壬申十
二月乙巳也銘曰

望東山兮繩厥祖踰梭溪兮不數武西有舉兮隨賢父
昔避居兮樂此土今相承兮若堂斧卜幽宮兮奠終古

日講官起居注翰林院侍講學士楊公墓誌銘

乾隆丁亥冬故學士楊公仲子耀曾持其兄述曾弟承
曾所爲公行狀徒跣走浙哭求銘嗚呼召南忍銘公墓
乎公學行高卓晚折輩行忘年相與講論疾革時猶作
書寄文稿屬點定嗚呼召南敢以病不文辭謹據狀條
其大者爲誌公諱椿字農先世爲武進望族今分隸陽

湖贈翰林修撰諱某公會祖也祖諱廷鑑明翰林院修撰父諱大鶴左春坊諭德母莊恭人有七子皆以文著公行第三稟奇質母自教之八歲五經成誦隨父居京師與二弟從同邑蔣弱六先生學慈谿姜西溟秀水朱竹垞見所作家傳深歎賞之姜曰此太史公文也年未二十卽以古文名天下性恥干謁游揚益鍵戶博通載籍康熙癸巳舉順天鄉試乙未會試中式以艱歸戊戌殿試成進士改庶吉士授翰林院檢討分修政治典要勤職冠同列雍正初授文林郎後兼明史及一統志國史三館纂修擢遷左中允未三月超授侍講學士充

日講起居注官兼修

三朝實錄

皇上御極授中憲大夫以祭告使秦蜀還奏途次見聞
七事議行者二豁免河灘地浮糧及酌給山西佐雜養
廉也纂修

憲皇帝實錄丁巳夏以原官致仕家居二年

特召還修明鑑綱目書成而公已老矣以二子官京師
畱就養晉封中議大夫癸酉十二月十日卒壽七十有
八公至性過人行己朴誠剛正守古矩度一跬步語笑
亦不苟自奉清約與朋友擇而後交終始不變德行巋

然最爲大學士高安西林兩文端尚書江陰楊文定所
重生平無他嗜好惟以經術史才爲文章自娛臨川李
公穆堂桐城方公望溪於人罕推服獨推服公一云文
惟其是似韓子一云得太史公之神似歐陽士林奉爲
定論嘗應

詔舉所知潘敏惠後以從子稷共稱得人分校順天所
取趙君燃乙等皆知名士前後因修書七進秩衆謂公
仕當大顯特以著作高館局未得展經濟才而公起草
率先同官以持論過高總裁亦不全用尤貫串有明一
代事可匹鄞縣萬季野所著贖稿長編與一統志稽古

錄水經注廣釋古今類纂毘陵科第譜牒諸書並藏於
家晚坐一室窮諸經手披口誦著古周易尚書定本詩
經釋辨春秋類考周禮訂疑多創解諸子勸少休公曰
我年視衛武作懿戒時尚遠矣敢自怠乎自刪訂孟隣
堂集爲二十六卷別集六卷郵寄同里蔣東委先生商
推歲至再三易簪時見架有

賜書曰我不敢以萎軀褻對命移之瞑目而逝嗚呼篤
學力行自幼至耄寢食生死於經史古文中不厭不倦
如公者世有幾人公書室必揭二語爲箴曰從孝弟著
力以聖賢爲師此可以見公之志矣配沈淑人闔德完

粹先二十五年卒公不復娶子男三人皆賢而有文長
述曾以一甲二名進士歷翰林侍讀次耀曾四川成都
縣丞次承曾戶部廣西司郎中女一人適州同知蔣植
孫五曰仁元曰仁譽曰仁壑曰仁均皆太學生曰仁基
幼曾孫二曰辛曰酉今以十二月某日葬公某鄉某山
之原銘曰

毘陵之楊系本宏農於前有光闡望顯融翰林四世可
比三公立德立言古稱不朽惟公學行守先待後我銘
幽宮以垂永久

雷母李太夫人墓誌銘

副憲雷公鉉母曰李太夫人

誥贈通奉大夫通政使惕廬公元配也遠近人士莫不稱非是母不能教成是子

聖天子孝治天下亦知之最深副憲自翰林選入授皇子經官通政使請假歸省己巳夏還京師

上念其母老 命督浙江學政辛未

前巡召對詢問賞賚有加尋移江蘇三年任滿仍視浙學丙子夏副憲以太夫人壽屆八十奏秋當報滿入覲而陳情

恩予卽侍親歸養不必來丁丑春副憲自閩至江浙迎

駕召對再三

賜萱榮綬社四大字并緞匹貂皮

諭汝亟歸爲母壽當是時人人感歎羨慕謂

聖主眷待賢臣拳拳然不忘乎家有老母母之賢益大著今年五月副憲郵訃狀來萬松嶺乞銘嗚呼女宗殞矣贈公先捐館二十有一年其葬也故宗丞荆溪任公誌之今當合厝召南雖病敢以譎陋不文辭按狀李寧化著姓太夫人父諱某喜讀書不殖生產見贈公力學器而字焉年十四歸於贈公上事祖姑奉尊章克盡婦職躬親爨飪浣滌之勞家雖貧無窘色及其後子旣貴

躋九列亦無矜容性恭儉仁恕遇人飢寒能周卹則曠然喜教子孫至老不倦方就養來浙時寧化蛟水發壞城垣民居而太夫人以先一月行汀人謂天鑿盛德俾太夫人無驚恐乙亥秋杭嘉諸郡大饑撫臣周後期不報民食草根殆盡副憲憫之欲直陳奏請於太夫人太夫人曰此何事容遲遲乎奏入

天恩立沛民困獲甦副憲身以學行爲江浙士子師剛正公明與情翕服浙人尤感頌故於太夫人之歸閩也士民攜老幼送至江干者十餘里不絕太夫人生康熙戊午十月二十日卒乾隆己卯二月二十七日年八十

有二子男三人長卽副憲次監生侯選州同鋪季歲貢
生鏃俱孝友有名女二長適張廷試次適庠生張嶧孫
十曰定淳舉人定澍監生定源定溶增廣生定灝定滋
定匯監生定溶定澗定澤曾孫四曰光桂光梓光楠光
槐太夫人德性純備遭際晚益亨初封太孺人累晉至
太夫人洵膺

九重隆恩異數生榮死哀可謂母道之極盛者矣銘曰
宋儒有賢母歐陽程蘇並傳教孝教忠二者有焉吾取
以銘雷母李太夫人之阡

文學邵君復菴墓誌銘

仁和博士弟子員邵君復菴以乾隆辛巳六月六日卒於家距生康熙庚辰十一月七日年六十有二將以某年月日葬於西湖普福嶺之原其子寶階從余遊與其弟寶勤衰經扶杖持君行狀以誌銘請余以病辭卽伏地慟不止予慮傷孝子心後將無復自奮以成其先人之志也爰書君梗概如左君諱教忠字匯瞻復菴其號宋康節先生後按君家譜有名潛字君佐者元時自晉陵來居慈谿爲一世祖明末有明經曰體仁謁選得官以國亡不赴任其子允昌隱居養親卽君曾祖也祖曰德華始由慈谿卜居於杭父曰敘發母曰沈氏應氏黃

氏兄弟五人長曰鴻次日敏知三日湄君行居四五曰
湧君早歲受知於安溪李公清植以第一人補博士弟
子員性好學居常手不釋卷遇前人著述必手自抄錄
積久篋笥充盈各爲評識朱墨爛然君父母先歿事繼
母黃能曲盡其歡初長兄鴻場以成立長嫂應主持中
饋君每事必咨請以行洎後分箸居猶感兄嫂德不置
視從子如己子鴻之子曰日章有隱德讀書不求仕進
尤愛憐之祖墓在慈谿北雪獅子山君考遺命必葬近
先代墓君與諸兄卒葬其親於慈谿之杜谷與人交樸
誠不欺中年信袁氏功過格夜必焚香告神嘗患背疽

幾殆自誓戒葷酒晨夕誦感應篇陰隲文數月不藥自瘳君每曰此予長兄達羽先生之教也達羽鴻字嘗官秦粵有聲君之孝友不矜蓋如此丁未春

天子南巡狩以獻詩賦得

賜佩包閭里榮之乃卒困場屋以諸生終其命也君臨沒誠其子曰居心正直方可爲子孫則讀書賢達方可爲祖父光吾已矣汝曹勉之嗚呼悲哉娶應氏子二長卽寶階庠生次寶勤業儒女二適縣學生盧蘭諸以淳銘曰

士以顯親揚名爲美以沒世無稱爲恥嗚呼勤學積行

如邵君而止於此天實爲之志足悲已蓋潛德幽光不耀於其身者必慶餘於孫子

秀水教諭張君墓誌銘

溫之平陽諸生黃宗銳溫江林鳴鳳李寅手條其師張君行實來萬松岡且拜且泣言墓石具矣句誌銘余感其誠不忍辭且張君行誼高近古賢士誌非余無爲誌者誌曰君諱超英字晉錫世居平陽之桃湖父曰歲貢天行母曰某氏兩弟俱遊庠有聲君最著孝友誠恪生平事皆可告人資穎敏工舉子業嘗從義門何先生游六經子史俱得條貫言理必宗程朱庚子舉於鄉文名

大起學徒徧郡邑晚官秀水教諭致仕歸爲鄉飲酒大
賓乾隆某年某日卒年七十有六其事親養志盡
禮居喪泣血三年目枯形槁幾死後遇忌猶哭失聲與
兩弟怡怡至老日數接必肅衣冠送之士友來不衣冠
不見言行兢兢不輕語笑嗜讀書如飢渴將展卷必先
正坐其訓士也諄諄於敦本立品務經術不尚浮華秀
水學有租僅供餽粥歸之日行李蕭然同官及門祖餞
多淚下沾襟爲立生祠題曰清廉遺愛東甌僻居海濱
俗兼浙閩人無智愚言及君必肅然起敬其沒也以某
年某月某日葬於某鄉之原元配陳氏封孺人有淑德

子二長致中庠生次致台業儒孫三人余夙聞君性迂
謹好潔日洗手不倦牀借客宿必洗牀偶於穢處遺金
卽棄不復顧手嘗腫如雞子羣醫駭然忽一日失去不
見衆謂好潔之報又嘗入市乞錢人欺之君不知也市
衆不服共罰欺者書室隣居火君捧書跪庭中火亦遂
熄鄉里稱奇今觀行實具載異哉諸弟子思慕其師私
謚君曰正潔實稱厥名然私謚非禮也君自號水南宜
稱曰水南先生銘曰

潔而端衾影不慚味古醴醴雖苦亦甘嗚呼水南

陝西西安城守叅將羅君墓誌銘

君諱某字某姓羅氏先世宋末自閩遷潮卜居揭陽之
上洋明初遷於城代有積德以諸生贈行人祀鄉賢諱
拱賜者君高祖也曾祖曰進士官吏部員外郎諱萬傑
國變後隱遁不復出鄉人私謚文節先生祖國學生諱
基蒙父康熙癸巳孝廉諱鎮瑞以君貴自曾祖以下俱
贈昭勇將軍妣皆贈淑人君孝友天至自幼穎悟異常
兒讀書明大義德器嶷然時論謂羅氏復見文節長而
儀觀魁梧工舉業又工騎射雍正癸卯中式武舉人丁
未成進士簡發浙江杭協攝樂清守備事掌溫衛印軍
政最遷直隸天津都司改駐白石口攝廣昌營久次遷

福建汀州右營遊擊調臺灣積勞擢陝西西安城守叅將所至皆有成績可紀樂清久旱令方高宴君曰爲民父母不當爲請命耶遂偕步禱得雨溫衛清理屯糧積弊人服其廉而白石在紫荊關外兩山中鳥道一線舊有關稅甚苛君毅然請於制府孫文定公減駝載及牛馬徵錢之半免肩負及雞豚之全以惠窮民制府深賞其言卽報可城小地僻君視民事如家事署南創義學教其子弟暇卽執卷自娛於九邊形勢靡不熟究

聖駕幸五臺道途治辦得甄錄地患虎君設賞格虔祀山神虎遠遁在白石十二年其去也兵民扶老攜幼泣

送數百里臺灣孤懸海外兵係閩八鎮更戍驕悍成風
君號令嚴明軍威肅然地多浮沙郡縣並無城郭前鎮
帥築一甌城歲修歲圯功迄無成君議上制府請仍用
木城官民便之奉檄稽察南北二路手圖山川道里阨
塞以歸其在西安 大兵方西討道經潼關君部署次
第戴星出入者數月後復分理臺站以軍功特晉一階
身督養馬送巴里坤往返無誤同官皆服其才謂顯擢
可指顧得而君竟以盡瘁卒矣嗚呼才識如君使爲守
令爲監司其政治及民必當如古良吏其設施詎止是
哉余又聞君年譜八歲喪母林氏哀戚如成人事繼母

魏曲盡其孝受叔父託代爲立後撫從子如己子入仕
後屢以歸省建宗祠營兆域置祀田宗黨戚友往來賙
卹靡閒言此固士大夫所共慕者其可不謂之賢矣乎
君生康熙庚辰十一月初十日卒於乾隆己卯八月初
二日享年六十娶謝氏有賢德封淑人子四長楨侯先
卒次楨佐楨倌楨仁女二長適普寧張紀豐次適同邑
李應進今將以某年某月某日葬君某鄉之原楨佐來
謁乞誌銘刻諸石銘曰
文武並重典有常君也儒將稱循良佳城旣卜銘其藏
厥德獲報後允臧

力行沈先生墓誌銘

乾隆壬午八月二十日仁和沈先生卒余同年友椒園伯兄余亦夙敬之如兄者也聞訃走唁椒園慟至失聲族黨羣謂先生行誼高宜追號力行先生顏其堂爲後人式椒園遵遺命不用佛事以癸未二月某日耐葬朱家澗祖塋旁來萬松岡徵誌銘不可辭沈爲吾浙甲姓自吳興竹墩明初始遷居於杭曰菊軒公十世至文學諱懷英先生曾祖也祖處士諱兆乾祖妣唐氏考廣東文昌令諱元滄妣查氏海寧少詹事聲山公女二代俱以椒園貴

誥贈通議大夫淑人先生諱廷樸字孟公兄弟三人仲
曰文學心季卽椒園俱賢能紹家庭及外祖學執經初
白查浦之門以詩文擅名人稱三沈而先生自幼至性
過人篤於孝友文昌公挈家隨聲山公入都也先生獨
畱侍奉祖母攻苦之暇卽侍左右承歡無閒年十九補
弟子員名籍甚鄉試數困則益讀書文昌公以

武英殿纂修出宰朱崖也畱二子侍母家居先生獨隨
侍往後經患難徵詣部往復海南旋適秦中卒於寧夏
徒跣哀號扶櫬歸奔走閒關頻年行三萬餘里風濤險
隘辛苦備嘗無一日得安枕臥當是時家徒壁立食指

益繁先生董兩弟遊學身操家政內外巨細勿以傷老
母心元配亡誓不再娶及椒園蒙

召試擢入翰林也先生畱仲弟家居身奉母就養京邸
者七年母思鄉復奉還里椒園爲御史時得危疾急裝
入都視之疾愈卽歸告母椒園之官山東河南也皆身
至署助經理母卒先生年將七十哀毀如喪父時服闋
數歲仲弟卒先生始病及椒園蒙

恩歸偕哭其仲得痲症勿可藥矣臨終訓弟姪如平生
神氣不亂距生康熙己巳閏三月九日享壽七十有四
配江氏淇縣知縣詒孫女有淑德無子先卒嘗以椒園

少子世炯爲後又先卒族黨曰先生詎可無後耶以椒園次孫守良爲世炯嗣先生詩文橐俱未刻嗚呼士所重在行不在文孝友本庸行能竭力盡心如古人者未可多得先生朴誠勤苦始終如一杭人其稱爲力行先生非擬私諡乃公論也銘曰

孝至沒齒有加無已友于兄弟心悲而死嗚呼先生可以爲子可以爲士

先考省齋府君先妣張太夫人壙記

先考諱鼎字宗器姓齊氏始祖宋宣義公之十七代明車駕郎中忠節公之十代孫也曾祖文學諱嘉逢妣陳

氏祖處士諱之仲妣節孝許氏考文學贈文林郎翰林院庶吉士諱化龍妣贈孺人徐氏府君生康熙十四年二月丁卯日卯時齊氏居天台城隍廟前世以孝謹爲家教至贈公學行純正爲士林所尊府君於兄弟中居長自幼承贈公訓讀書循理德度凝然同邑張介靖先生方爲孫女擇壻心器之語子熊卜明經曰得齊幽溪子爲壻兩家可比古荀陳矣時明經才名冠郡邑三子皆英挺府君以壻從學學使黃岡張公拔入邑庠文譽大起府君志在奉親不慕榮進嘗赴闈試聞妣徐孺人疾卽歸及免喪贈公勸令應舉輒辭惟以卷軸自娛晨

夕不離左右而已性寬和厚重樂善孜孜雖造次未嘗有疾言厲色與人交終始如一是以鄉人敬而愛之莫不稱篤行君子教不肖等最重朱子小學及近思錄曰此希賢大路也於古詩愛陶韋自號省齋乾隆丁巳遇覃恩封文林郎翰林院庶吉士又晉封檢討以癸亥十二月八日卒壽六十有九先妣張太夫人賢明識大義明總憲太素公元孫女祖介靖父熊卜兩先生於幼時口授孝經四書卽成誦母陳愛之及歸府君事舅姑如事父母待娣姒諸姑如親姊妹撫妾婢如兒女邑中稱賢淑者必首推太夫人居無片刻之間祭祀賓客酒食

立辦紡績縫補夜以繼日凡族黨婚嫁喪葬儀節有疑
必來請問一言動卽爲闔閭楷模有五子與府君共立
程課嚴肅較府君有加旣封太孺人娣姒勸稍華飾荅
曰吾家以勤儉朴素獲祐於天敢勿守前德訓後人乎
府君卒後五年太夫人病不肖召南適
予告歸養辛未春恭迎

聖駕南巡

召對於吳江

行殿琅琅

天語下詢汝老母健否侍從者無不傳以爲榮及十一

月三日疾革猶神明不亂訓子孫積善修德如府君臨終時享年七十有七嗚呼痛哉太夫人以七月二十五日生與府君同年也府君於例宜晉贈資政大夫禮部右侍郎太夫人宜晉贈正二品不肖子長周南辛酉舉人揀選知縣次召南丙辰博學鴻詞由翰林官至禮部侍郎次圖南邑廩生次世南丁卯舉人候選知縣次道南邑庠生有孫十二周南子庠生式唐召南子式遷圖南子式訓式讚式訥式謨式詵式論世南子式序式廓式康道南子式誠曾孫二式唐子傳經執經皆幼不肖等遵治命卜宅兆於花坑之原北去贈公墓僅十里乃

以乾隆壬申十月合葬嗚呼惟我府君太夫人德甚厚
行甚高不肖等不能顯揚於萬一謹次敘世系及生平
梗概而掩諸幽異日將請賢而有文者爲表其隧昊天
罔極嗚呼哀哉不肖子周南篆蓋召南爲記圖南書之
世南道南刻於石

勅封徵仕郎翰林院檢討顯考省齋府君行述

嗚呼痛哉府君竟棄不孝周南等而長逝矣府君素強
無疾年踰六十精神不衰同鄉戚友咸以府君鍾德朴
茂必躋上壽至不諱之事微特人子所不忍言亦夢寐
中萬萬所不及料者也嗚呼痛哉乃竟以左鬢發疽醫

藥罔效半月閒遂至不起天之降禍於不孝等至斯極耶不孝召南又以羈職京師不獲親視含殮擗踊號呼追從無路尚何忍偷生視息於人世惟是府君一生德行信於士論重於鄉評實有可以追配古人而無愧者倘或泯沒不傳則不孝等罪戾滋大用敢瀝血和墨粗陳其略惟仁人君子賜垂聽焉府君姓齊氏諱籛字宗器號省齋先世汴之祥符人隨宋高宗南渡僑寓杭州始祖德闈公諱盛由進士官宣義郎始占籍天台厥後子姓繁衍科名相望七世祖忠節公諱汪明英宗時以車駕司郎中殉難土木事具明史崇祀鄉賢祠及

欽旌節孝祠祖邑庠生

覃恩馳贈文林郎翰林院庶吉士幽溪公諱化龍妣徐氏馳贈孺人有子四長卽府君次叔父邑庠生鈞礪公祖尚次郡庠生拙存公長庚次邑庠生宗實公重光台人氏族大半由宋南渡而齊氏自宣義公後世用孝謹爲家法幽溪公德行完備士林奉爲楷模府君幼篤實祇承庭訓尺寸勿踰幽溪公愛之長受學於外祖熊卜張公與舅氏兄弟三人學問相砥礪所業日進楚黃張石虹公督浙學拔補博士弟子員當是時舅氏三人文名大起郡邑中稱三張而外祖特重府君常曰齊甥雅

量彷彿古人其福澤不可及也府君性恬淡愛讀書不
愛榮利嘗一就棘闈試大雨誤墮溝衣袴俱濕試既畢
歎曰吾豈以性命博科名哉自是遂無意仕進幽溪公
亦不強之外祖屢以爲言幽溪公笑曰漁樵偶逢蛇虎
卽誓不入山澤迂矣哉然充斯志也登高臨深吾知免
矣比不孝周南等每赴省試拜行之日府君猶必諄諄
命曰科名有數風甚勿行舟雨甚勿入場也生平恪遵
幽溪公教將讀書必先靜坐作字雖倉卒必用楷正居
家崇儉素與人交有始終以是郡邑中無問識與不識
言及府君必曰朴誠君子不孝等束髮讀書府君手授

以經夜則吾母張太孺人課之母性賢明不孝等誦習
稍不及程呵責不少恕府君顧寬假之曰教童子第不
當養成游惰耳資性敏鈍何可強束縛過嚴天機必窒
吾所爲一張一弛者非縱之正誘之也訓不孝等時時
寫馬援戒兄子書崔瑗座右銘以爲準的不孝等自幼
至壯未嘗見府君有疾言厲色時雖臧獲下人終身不
遭叱罵聞人善企慕如不及聞人不善務覆匿之雖古
人事亦然友朋聚會談史譏貶某代某人議論風生府
君泊然不發一語徐曰某代有某人可師某事可法何
不言耶座客皆改容謝其長厚如此寒族譜牒歲久未

修雍正癸丑府君自立條例率族人修之系圖事實義簡而該自是邑中諸族修譜者率以齊氏譜爲式乾隆初有

詔舉賢良方正吾郡輿論首推府君邑令張公再三造門請府君力辭執友交相勸府君曰無其實敢居其名乎且吾自度行誼何如先人先人尚力辭鄉飲大賓吾其敢當賢良哉卒不就不孝召南之蒙

恩擢入翰林也府君手書戒曰汝倖登大科顧名思義知必慚惡雖然博學誠難好學力行可也鴻詞誠難修詞立誠可也謙受益滿招損汝其識之後數年不孝召

南連以省覲請府君堅拒及不孝周南北上赴禮部言
府君曰汝語召南吾與汝母未老召南年方壯聞館書
次第告成不可歸癸亥夏不孝召南蒙

恩擢中允以明年爲府君及吾母張太孺人七十壽因
寄書堅請省歸府君復堅拒之嗚呼痛哉府君疽初發
時不孝周南等私竊懼府君曰吾生平無疾卽有小病
亦勿藥愈無憂疾革不孝等環牀泣府君曰止吾年至
七十不爲不壽而受

恩封不爲不榮生寄死歸分也何悲時府君雖在彌留
神識不亂顧不孝周南曰汝執筆述吾語寄召南聞訃

毋過毀

君恩高厚異日能報效萬一吾目瞑矣不孝圖南等又請遺訓府君曰要積善要讀書我身後勿作佛事喪勿用樂嗚呼痛哉府君生於康熙乙卯年二月二十七日卯時卒於乾隆癸亥年十二月初八日申時享年六十有九初遇

覃恩勅封文林郎翰林院庶吉士再遇

覃恩勅封翰林院檢討配吾母張氏

勅封孺人歲貢生候選訓導諱利璜女子男六不孝周南辛酉科舉人娶陳氏邑庠生諱之麟女次不孝召南

癸卯拔貢己酉科副榜乾隆元年

召試博學鴻詞授翰林院庶吉士歷任日講官起居

注翰林院侍讀娶張氏縣學生諱正吉女次不孝圖南

邑增廣生娶龐氏諱若霖女繼娶范氏諱一飛女次不

孝世南縣學生娶丁氏邑庠生諱定國女繼娶陳氏貢

生諱兆謀女次不孝道南邑庠生娶陳氏貢生諱天眷

女皆吾母張太孺人出次不孝指南聘陳氏邑庠生諱

山西女庶母王氏出女一適邑庠生楊諱修子鴻緒先

卒孫男九不孝周南出者一式唐娶陳氏邑庠生諱朝

銓女不孝召南出者一式遷聘邑庠生張諱仁安女不

孝圖南出者四式訓聘邑庠生龐諱璵女式讚聘姜諱
元燈女式訥式讓俱幼未聘不孝世南出者二式序式
廓不孝道南出者一式健俱幼未聘女孫四不孝周南
出者二長許字陳諱天民子樞兆次許字國學生張諱
仁憲子純禮不孝召南出者二長許字張諱仁寰子緝
禮次許字拔貢生現任貴州定番州州判潘諱煊子掄
甲不孝荒迷脅亂略述梗槩語無倫次挂漏尤多伏冀
大人先生矜其至痛至愚賜之誌表以光泉壤不孝兄
弟感且不朽世世子孫感且不朽

寶綸堂文鈔卷八